

Samordna opptak har opna for søking – No kan du velje mellom rekordmange studium

1. februar opna det samordna opptaket til universitet, høgskular og fagskular.

I 2023 blir det tilbydd nesten 76 000 studieplassar fordelt på over 1800 studium ved fagskular, høgskular og universitet.

– Aldri før har søkerane hatt så mange studium å velje mellom. Det store talet på studieplassar, og variasjonen som institusjonane tilbyr, gir søkerane mykje å velje mellom, seier Sveinung Skule, direktør i Direktoratet for høgare utdanning og kompetanse.

Fleire kan få studieplass

I år er det over 1300 studium søkerane kan velje mellom. Totalt skal nesten 63 000 studieplasser ved universitet og høgskular i Noreg delast ut ved årets opptak.

– Vi ser ei lita auke i talet på studium som blir tilbydd, samanlikna med i fjor. Det er særstakt hyggeleg med ei auke i talet på studieplassar. Det kan gjere at fleire enn nokon gong kan få oppfylt draumen om å ta høgare utdanning, og kan bidra med kompetanse som samfunnet treng, seier Skule.

62 nye fagskuletilbud

Søkerar som ønsker å ta høgare yrkesfagleg utdanning på fagskule, har i år nesten 500 studium å velje mellom gjennom Samordna opptak. 62 av fagskuletilboda er heilt nye.

– Arbeidslivet ropar etter fleire med fag- og yrkeskompetanse. Skal vi som samfunn kunne møte dei omstillingane og utfordringane vi står ovanfor, trenger vi fleire med solid yrkesretta kompetanse, seier Skule.

Totalt er det 24 fagskular som lyser ut studieplassar gjennom Samordna opptak. Fagskuleutdanning er høgare yrkesfagleg utdanning som byggjer på yrkeskompetanse, studiekompetanse eller realkompetanse, og kan mellom anna gje fagskulegrad og høgare fagskulegrad. Utdanningane varer normalt mellom eit halvt og to år.

Éin søknad til fleire studium

Gjennom Samordna opptak kan du enkelt søke opptak til fleire lærestadar og studium med berre éin søknad. For dei som ønsker å søke opptak til både fagskule og universitet/høgskule er det naudsynt med to søknadar.

Søkerar har framleis god tid til å finne ut kva utdanninger dei skal söke på. Søknadsfristen i år er 15.april kl. 23.59, og både Samordna opptak og lærestadane står klare til å hjelpe søkerane med råd og informasjon underveis i søkeprosessen. I tillegg kan søkerane finne informasjon om dei forskjellige studia og yrka på utdanning.no.

Publiseringssdataar for årets søker- og opptakstal finn du i [informasjonsplan for Samordna opptak 2023](#). Sjå også pressemeldingar frå Kunnskapsdepartementet for meir informasjon.

Fakta:

Samordna opptak koordinerer opptaket til 27 universitet og høgskular og 24 fagskular.

1. januar 2022 blei Samordna opptak ein del av Direktoratet for høgare utdanning og kompetanse (HK-dir). Direktoratet er eit resultat av sammenslåinga av Diku, Kompetanse Norge, Universell og delar av Unit, NSD og NOKUT.

Universitet og høgskular:

Studieplassar ved universitet og høgskular: 62 693

Studium ved universitet og høgskular: 1332

Talet på universitet og høgskuler du kan søke på gjennom Samordna opptak: 27

Nye studium ved universitet og høgskular: 40

Fagskular:

Studieplassar ved fagskular som blir tilbydd gjennom Samordna opptak: 12 832

Studium ved fagskular du kan søke på gjennom Samordna opptak: 467

Fagskular som er ein del av Samordna opptak: 24

Nye fagskulestudium: 62